



**Sumáriu Kazu**  
**Tribunál Judisiál Primeira Instáncia Oekusi**  
**Maiu 2022**

**Afirmasaun:** Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

**A. Sumáriu prosesu julgamentu kazu iha Tribunál Judisiál Primeira Instáncia Oekusi**

**1. Totál kazu ne'ebé JSMP monitoriza: 10**

Artigu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika	5
Artigu 171 KP no artigu 173 KP	Koasaun seksuál agravadu	1
Artigu 316 KP	Kontrabandu	2
Artigu 207 KP	Kondusaun sein karta	1
Artigu 157 KP no artigu 20 (1) artigu 2 (2 alinea f) kona-ba Lei Arma Brankas	Krime ameasa no arma brankas	1
<b>Totál</b>		<b>10</b>

**2. Totál desizaun ne'ebé JSMP monitoriza: 10**

Tipu desizaun	Artigu	Númeru
Prizaun	Artigu 66 KP	1
Suspensaun ba prizaun nia ezekusaun	Artigu 68 KP	6
Multa	Artigu 67 KP	3
<b>Totál</b>		<b>10</b>

**3. Total kazu sira ne'ebé kontinua prosesu tuir JSMP nia monitorizasaun: 0**

Rua Beco Lakateu, Aldeia Manu fuik,  
Suku Colmera, Administrativu Vera Cruz  
Dili Timor Leste  
PoBox: 275

Telephone: 3323883 | 77040735

[www.jsmp.tl](http://www.jsmp.tl)

[info@jsmp.tl](mailto:info@jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl

## **B. Deskripsaun sumáriu julgamentu ba desizaun kazu sira**

### **1. Krime ofensa ba integridade fízika simples ho natureza violénsia doméstika**

Nú. Prosesu : 0084/22.OEPMK  
Kompozisaun Tribunál : Singulár  
Juis : Dra. Florencia Freitas  
Prokuradór : Dr. Mateus Nesi  
Defeza : Dr. Calisto Tout  
Desizaun : Pena prizaun fulan 6 suspende ba tinan 1

Iha 08 Maiu 2023, Tribunál Judisiál Primeira Instánsia Oekusi prezide leitura sentensa ba kazu ofensa ba integridade fízika simples ho natureza violénsia doméstika ne'ebé envolve arguidu EO hasoru nia feen, Iha Regiaun Administrativu Espesiál Oekusi Ambeno (RAEOA).

### **Akuzasaun Prokuradór**

Prokuradór akuza katak iha 10 Novembru 2022, maizumenus iha oras tuku 18:00 kalan, arguidu tebe lezada dala ida iha kanotak rezulta lezada sofre moras, kaer iha lezada nia kabaas dudu ho maka'as kauza lezada monu ba rai, la to'o iha de'it arguidu kontinua lori ai-sanak ida baku iha lezada nia liman laran parte loos rezulta bubu no moras. Aktu ne'e akontese bainhira arguidu fila ba uma ho kondisaun lanu no diskute malu ho lezada, ho nune'e arguidu komete agresaun ne'e hasoru lezada. Kazu ne'e aneksa hamutuk ho relatóriu médiku husi PRADET no fotografia sira husi Polísia VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha audensia julgamentu, arguidu konfesa faktu hotu iha akuzasaun no deklara katak arrepende nia hahalok, di'ak malu ona ho lezada, foin primeiravés mai hatan iha tribunál, promete sei larepete hahalok hanesan iha futuro, serbisu hanesan to'os na'in nune'e laiha rendimentu fixu kada fulan, oan na'in rua no arguidu mak iha responsabilidade ba nia família.

Depoisde rona deklarasaun arguidu nian, prokuradór husu ba tribunál atu presinde deklarasaun lezada nian tanba konsidera prova suficiente ona. Relasiona ho pedidu ne'e, defeza laiha opozisaun. Nune'e, tribunál presinde audisaun ba lezada ho testemuña sira.

### **Alegasaun finál**

Prokuradór konsidera hahalok arguidu nian priense duni elementu krime ofensa ba integridade fízika simples ho natureza VD, bazeia ba konfisaun arguidu nian, nune'e atu prevene krime ne'e akontese tan iha futuro husu ba tribunál atu kondena arguidu tuir artigu 145 KP.

Enkuantu defeza husu ba tribunál atu fó pena ne'ebé kmaan ba arguidu ho konsiderasaun katak arguidu konfesa, arrepende nia hahalok, di'ak malu ona ho lezada,

foin primeiravés mai hatan iha tribunál, promete sei larepete hahalok hanesan iha futuru, serbisu hanesan to'os na'in nune'e laiha rendimentu fixu kada fulan, oan na'in rua no arguidu mak iha responsabilidade ba nia família.

### **Desizaun**

Depoisde avalia faktu hotu, tribunál prova katak arguidu tebe lezada dala ida iha kanotak rezulta lezada sofre moras, kaer lezada nia kabaas dudu ho maka'as kauza lezada monu ba rai, la to'o iha ne'e de'it arguidu kontinua lori ai-sanak baku dala ida iha lezada nia liman laran parte loos rezulta bubu no moras.

Bazeia ba faktu provadu hirak ne'e no tetu mós ho sirkunstánsia sira ne'ebé mak hatodan no hakmaan arguidu nia responsabilidade kriminál, tribunál konklui prosesu ne'e no kondena arguidu ho pena prizaun fulan neen suspende ba tinan ida.

### **2. Krime koasaun seksuál agravadu**

Nú. Prosesu	: 0101/22.OESIC
Kompozisaun Tribunál	: Koletivu
Juis	: Dra. Florensia Freitas : Dr. Yudi Pemarkas : Dr. Hugo da Cruz Pui
Prokuradór	: Dr. Mateus Nessi
Defeza	: Dr. Filipe Landos
Desizaun	: Pena prizaun tinan 4

Iha 11 Maiu 2023, Tribunál Judisiál Primeira Instánsia Oekusi prezide leitura akordaun ba krime koasaun seksuál agravadu ne'ebé envolve arguidu TLX hasoru lezada (FS), iha Regiaun Administrativu Espesiál Oekusi Ambeno (RAEOA).

### **Akuzasaun Prokuradór**

Iha loron no fulan ne'ebé la apura maibé iha tinan 2021, arguidu ho nia feen (ANBB) ba husu lezada nia inan-aman iha Manatuto atu lori lezada hela ho sira iha sira nia uma hodi fo esloka lezada iha Oekusi, no sira mak sei responsavel tomak ba lezada nia edukasaun, roupa no nesesidade sira seluk, tanba ne'e maka lezada nia inan-aman mós hakarak.

Tuir mai iha data no oras ne'ebé lezada haluha tiha ona iha Outubru 2021, iha kalan, lezada toba hamutuk ho arguidu nia oan mane ho idade tinan 3 iha lezada nia kuartu ne'ebé odamatan laiha taka de'it ho kurtina. Nune'e arguidu tama ba lezada nia kuartu laran finji bo'ok nia oan mane maibé arguidu nia liman kose hela lezada nia hirus matan parte karuk, kauza lezada hakfodak no tauk, maibé lezada seidauk deskonfia arguidu, tanba arguidu finji husu lezada katak "*labarik toba ona*" no lezada hatan katak "*toba ona*".

Iha 21 Juñu 2022, iha oras tuku 18:30 kalan, bainhira arguidu nia feen laiha, lezada tama ba arguidu sira nia kuartu atu hamos no foti fronhas iha armariu, arguidu tama tuir lezada hodi taka no xave odamatan, hamate ahi hodi rei lezada nia orgaun sensitivu no hatama liman ba lezada nia orgaun sensitivu, kauza moras no lezada sente tauk no esforsu a'an hodi dada sai arguidu nia liman husi ninia orgaun sensitivu, maibé arguidu nafatin kontinua nia asaun ne'e. Arguidu sempre fó osan ba lezada nia nesesidade ho montante

diferenti hanesan US\$2.50, US\$5.00 no US\$10.00, maibé osan sira ne'e lezada rai de'it ho total osan hamutuk US\$30.50, tanba lezada senti tauk, trauma, triste, laran moras, la hakmatek no laiha konsentrasaun iha eskola no sofre moras iha lezada ninia orgaun sensitivu. Arguidu halo krime ne'e ho livre, deliberada, konsientemente, aproveita situasaun ne'ebé adekua kauza lezada tauk, tristi, lakon nia virgem, estraga lezada nia futuru no kontra lezada nia vontade.

Prokuradór akuza arguidu kontra artigu 171 KP kona-ba koasaun seksuál ho moldura penál tinan 2 too tinan 8 no artigu 173 KP kona-ba agravaasaun.

### **Produsaun ba prova sira**

Iha prosesu julgamentu arguidu konfesa parsialmente ba faktu iha akuzasaun no deklarata katak iha 2021 kalan, lezada toba ho arguidu nia oan mane arguidu tama ba haree nia oan no atu kaer labarik mak liman mak kaer sala lezada nia orgaun sensitivu. Iha Juñu 2022, iha oras tuku 19:00 kalan, arguidu foin fila husi serbisu fatin tama ba kuartu laran atu troka maibé lezada iha kuartu laran no troka hela fronthas, nune'e arguidu hakuak no rei lezada iha ibun, kaer lezada nia orgaun sensitivu maibé arguidu la hatama liman ba lezada nia orgaun sensitive no arguidu mós deklarata katak nia la obriga lezada maibé bainhira arguidu book lezada, lezada nonook de'it la ko'alia buat ida ba arguidu.

Arguidu deklarata liután katak durante lezada hela ho arguidu, arguidu sempre fó osan ba lezada nia presija, tanba arguidu hatene katak nia mak responsavel ba lezada nia nesidade tomak, no iha akontesimentu ne'e arguidu la lori osan fó ba lezada.

Arguidu iha oan na'in tolu, serbisu iha Óspital Regionál Oekusi ho vensimentu kada fulan US\$610.00. Depoisde akontesimentu ne'e arguidu arrepende ona nia hahalok foin primeiravés mai hatan iha tribunál no promete sei la repete tan hahalok hanesan iha futuru hasoru lezada ka ema seluk, arguidu ho nia família husu ona deskulpa ba lezada ho nia família no sira diak malu ona, fó sala malu tuir kultura, arguidu fó ona osan US\$750.00 ho tais feto ida ba lezada ho nia família.

Enkuantu lezada kontinua konfirma faktu hotu iha akuzasaun no deklarata katak depoisde akontesimentu ne'e lezada halai sai husi arguidu nia uma, ba hela iha lezada nia kolega nia uma no kontaktu lezada nia família hodi fó hatene ba lezada nia família kona-ba akontesimentu refere, no lezada kontinua ba apresenta keixa iha prokuradór.

Testemuña AS nu'udar lezada nia kolega depoimenta katak iha akontesimentu ne'e lezada telefone testemuña ho lian nakdedar, tanis no konta tuir akontesimentu ba testemuña, nune'e testemuña haruka lezada tenki se'es ka sai kedas husi fatin refere hodi prevene a'an.

### **Alegasaun finál**

Prokuradór konsidera arguidu provadu komete krime koasaun seksuál hasoru lezada, mezmú arguidu koko atu nega faktu balun iha akuzasaun, maibé lezada konfirma faktu hotu iha akuzasaun no reforsa mós ho testemuña ninia deklarasaun no prova mós husi

relatóriu médiku katak arguidu hatama objeitu ruma ba iha lezada nia orgaun sensitivu. Tanba ne'e husu ba tribunál atu kondena arguidu tuir artigu 171 KP.

Entertantu defeza husu ba tribunál atu kondena arguidu ho pena ne'ebé adekuadu ho konsiderasaun katak iha produsaun ba provas arguidu ho lezada nia deklarasaun kontrariu ba malu tanba lezada dehan obriga maibé arguidu deklarasaun katak lezada mós hakarak no lahalo reasaun hasoru arguidu nia aktu sira.

### **Desizaun**

Depoisde avalia ba faktu hotu ne'ebé produs durante julgamentu tribunál prova katak arguidu ninia hahalok ne'e priense duni elementu husi krime koasaun seksuál ho agravasaun mezmú arguidu koko atu nega faktu balun, maibé lezada konfirma akuzasaun no reforsa mós ho relatóriu médiku.

Bazeia ba faktu provadu hirak ne'e no tetu mós ho sirkunstánsia agravantes no atenuantes sira hanesan depoisde akontesimentu ne'e arguidu ba husu ona diskulpa ba lezada nia família ho nune'e tribunál konklui prosesu ne'e no kondena arguidu ho pena prizaun tinan haat prizaun.

### **3. Krime kontrabandu**

Nú. Prosesu : 0078/21.OESIC  
Kompozisaun Tribunál : Kolektivu  
Juis : Dr. Yudi Pamukas  
: Dra. Florencia Freitas  
: Dr. Hugo da Cruz Pui  
Prokuradór : Dr. Mateus Nesi  
Defeza : Dr. Filipe Landos (Advogadu privadu)  
Desizaun : Pena prizaun tinan 2 suspende ba tinan 2

Iha 11 Maiu 2022, Tribunál Judisiál Primeira Instánsia Oekusi prezide julgamentu leitura akordaun ba krime kontrabandu ne'ebé envolve arguidu Joaquim Quelo hasoru Estadu RDTL, iha Aldeia Saben, Suku Bobometo, Sub-regiaun Oesilo, RAEOA.

### **Akuzasaun Prokuradór**

Prokuradór akuza katak iha 15 Jullu 2021, maizumenus iha oras tuku 12:30 meiodia, arguidu ba Kefa-Indonezia hodi sosa sasan hanesan pesa motorizada nian hafoin lori tama mai liuhusi dalan ilegal ho objetivu atu labele selu taxa ba iha Alfandega.

Prokuradór akuza arguidu kontra artigu 316 KP kona-ba krime kontrabandu ho moldura penál tinan 2 too tinan 6 ka multa.

### **Produsaun ba prova sira**

Iha julgamentu, arguidu konfesa integralmente ba faktu hotu iha akuzasaun katak loos duni nia hatama sasan hanesan motorizada nia pesa husi Indonezia mai territoriu Timor Leste la tuir dalan legal, arguidu mós deklarasaun katak depoisde akontesimentu ne'e arguidu konsiente katak hahalok hanesan ne'e ladi'ak, arrepende ona nia hahalok, serbisu hanesan toos na'in laiha rendimentu fiku kada fulan, foin primeiravés mai hatan iha

tribunál, kaben na'in no iha oan na'in rua, promete sei larepete hikas hahalok ne'e iha futuru.

Depoisde rona deklarasaun arguidu nian, prokuradór konsidera prova suficiente ona nune'e husu ba tribunál atu presinde testemuña ninia depoimentu. Defeza laiha opozisaun ba pedidu ne'e. Bazeia ba pedidu ne'e, tribunál presinde testemuña ninia depoimentu.

### **Alegasaun finál**

Prokuradór intende katak laiha duvida ba faktu hotu iha akuzasaun tanba iha produsaun ba prova arguidu rasik konfesa integralmente. Prokuradór konsidera arguidu nia hahalok ne'e prenze duni elementu krime kontrabandu, nune'e husu ba tribunál atu kondena arguidu tuir pena ne'ebé hakerek ona iha akuzasaun.

Entretantu defeza haktuir katak durante iha produsaun ba prova arguidu kolabora diak ho tribunál hodi konfesa integralmente ba faktu hotu iha akuzasaun. Arguidu hatama sasan ilegal ne'e laos atu faan tutan maibé atu uza hadia ninia motorizada. Depoisde akontesementu arguidu konsiente katak hahalok hanesan ne'e ladi'ak, arrepende ona nia hahalok, serbisu hanesan toos na'in laiha rendimentu fiksi kada fulan, foin primeiravés mai hatan iha tribunál, kaben na'in no iha ona oan na'in rua, promete sei larepete hikas hahalok ne'e iha futuru. Tanba ne'e defeza husu ba tribunál atu fó kastigu tuir arguidu sira nia sala.

### **Desizaun**

Depoisde avalia faktu hotu tribunál prova katak arguidu ba Kefa-Indonezia hodi sosa sasan hanesan pesa motorizada nian hafoin lori tama mai liuhusi dalan ilegal ho objetivu atu labele selu taxa ba iha Alfandega.

Bazeia ba faktu provadu sira ne'e no tetu mós ho sirkunstánsia atenuante sira hanesan, arguidu konfesa, arrepende ona nia hahalok, foin primeiravés mai hatan iha tribunál no promete sei la komete tan krime hanesan iha futuru. Tanba ne'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

### **4. Krime ofensa ba integridade física simples ho natureza violéncia doméstika**

Nú. Prosesu : 0076/22.OEPMK  
Kompozisaun Tribunál : Singulár  
Juis : Dra. Florencia Freitas  
Prokuradór : Dr. Mateus Nesi  
Defeza : Dr. Afonso Gomes Fatima  
Desizaun : Pena prizaun tinan 1 suspende ba tinan 1

Iha 16 Maiu 2023, Tribunál Judisiál Primeira Instánsia Oekusi prezide julgamentu leitura sentensa ba kazu ofensa ba integridade física simples ho natureza violéncia doméstika ne'ebé envolve arguida CJC hasoru nia aman, iha RAEOA.

### **Akuzasaun Prokuradór**

Prokuradór akuza katak iha 30 Outubru 2022, maizumenus iha oras tuku 07:00 dadeer, arguida buti lezadu nia kakorok, basa dala rua iha lezadu nia hasan oin besik matan fukun parte loos no kontinua lori ai-sanak duni tuir lezadu no baku lezadu nia ulun, rezulta lezadu sofre moras, mean no moras iha kakorok. Antes agresaun ne'e, arguida no lezadu diskute malu kona-ba lezadu faan tiha rai ne'ebé sira hela ba ninia sorin tanba persija duni osan uza ba halo lia, ho nune'e mosu agresaun hirak ne'e. Kazu ne'e aneksu hamutuk ho relatóriu médiku husi PRADET no fotografia kona-ba aktu violénsia ne'e hasai husi polísia.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál too tinan 3 ka multa, konjuga ho artigu 2, 3(c), 35(b) no 36 LKVD.

### **Produsaun ba prova sira**

Iha julgamentu, arguida konfesa integralmente ba fatktu hotu iha akuzasaun no hatene buti, basa no lori ai-sanak baku lezadu bele halo lezadu sofre moras, maibé arguida halo aktu ne'e ho hakarak rasik sein haruka husi ema seluk. Depoisde akontesimentu arguida arrepende ninia hahalok, diak malu ona ho lezadu no to'o agora laiha tan problema seluk, foin primeiravés mai hatan iha tribunál, promote sei larepete tan hahalok hanesan iha futuro, laiha rendimentu fiksi kada fulan no iha oan na'in rua.

Enkuantu lezadu kontinua konfirma faktu hotu iha akuzasaun no deklara katak depoisde akontesimentu sira diak malu fali no kontinua moris hamutuk nafatin iha uma ida hanesan aman ho oan to'o agora laiha tan ona problema seluk.

### **Alegasaun finál**

Prokuradór konsidera hahalok arguida nian prenze duni elementu krime ofensa ba integridade fízika simples ho natureza violénsia doméstika hasoru lezadu ne'ebé hanesan mós nia aman. Prokuradór haktuir tan katak tuir loloos arguida mak tenke respeita ninia aman no uza maneira seluk atu bele rezolve problema ne'ebé akontese ona maibé pelu kontrariu arguida fila halo agresaun fízika hasoru ninia aman. Tanba ne'e, husu ba tribunál atu aplika pena prizaun ba arguida tuir artigu 145 KP.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak arguida konfesa, arrepende ona nia hahalok no diak malu ona ho lezadu.

### **Desizaun**

Depoisde avalia ba faktu hotu, tribunál prova katak arguida buti lezadu nia kakorok, basa dala rua iha lezadu nia hasan oin besik matan fukun parte loos no kontinua lori ai-sanak duni tuir lezadu no baku lezadu nia ulun, rezulta lezadu sofre moras, mean no moras iha kakorok.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok no diak malu ona ho lezadu, nune'e tribunál

tribunál konklui prosesu ne'e no kondena arguidu ho pena prizaun tinan ida suspende tinan ida.

## **5. Krime ofensa ba integridade física simples ho natureza violéncia doméstika**

Nú. Prosesu : 0193/22.OESIC  
Kompozisaun Tribunál : Singulár  
Juis : Dra. Florencia Freitas  
Prokuradór : Dr. Mateus Nesi  
Defeza : Dr. Afonso Gomes Fatima  
Desizaun : Pena multa US\$240.00

Iha 16 Maiu 2023, Tribunál Judisiál Primeira Instáncia Oekusi prezide leitura sentensa ba kazu ofensa ba integridade física simples ho natureza violéncia doméstika ne'ebé envolve arguidu SSF hasoru nia feen, iha RAEOA.

### **Akuzasaun Prokuradór**

Prokuradór akuza katak iha 06 Dezembru 2022, maizumenus iha oras tuku 07:00 dadeer, arguidu uza fiu komputador nian baku dala ida iha lezadu nia matan fukun parte loos, tuku dala ida iha lezada nia oin maibé lakonsege kona, tanba lezada satan netik ho liman no kona fali iha lezada nia liman no kontinua tebe dala ida iha lezada nia ibun parte loos, resulta lezada sofre, bubu, mean no moras. Antes agresau ne'e, arguidu ho lezada diskute malu kona-ba lezada haruka sira nia oan ba sosa paun no bainhira iha dalan sira nia oan han tiha balu, nune'e arguidu hirus lezada korta netik mak mosu agresau ne'e. Kazu ne'e aneksa hamutuk ho relatóriu médiku husi PRADET no fotografia sira hasai husi polísia.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál too tinan 3 ka multa, konjuga ho artigu 2, 3(a) 35(b) no 36 LKVD.

### **Produsaun ba prova sira**

Iha julgamentu, arguidu konfesa faktu hotu iha akuzasaun no hatene katak hahalok sira hanesan ne'e ladi'ak tanba apenas halo lezada sofre moras deit. Depoisde akontesimentu arguidu arrepende ona nia hahalok, diak malu ona no to'o agora moris hamutuk nafatin iha uma ida hanesan feen ho la'en, foin primeiravés mai hatan iha tribunál, promete sei larepete hahalok hanesan iha futuru, serbisu hanesan funsionariu públiku iha departementu agrikultura ho vensimentu kada fulan US\$346.00 no iha oan na'in haat arguidu mak tau matan ba iha sira nia nesesidade uma laran nian.

Alende ne'e, lezada kontinua konfirma faktu hotu iha akuzasaun no deklarata katak depoisde akontesimentu to'o agora arguidu lahalo ona agresau física hasoru lezada no desde sira hola malu to'o agora arguidu foin primeiravés halo agresau física hasoru lezada. Lezada kontinua reforsa liután katak depoisde akontesimentu sira dame malu kedas to'o agora kontinua moris hamutuk nafatin iha uma ida.

### **Alegasaun finál**



Prokuradór konsidera arguidu ninia asaun ne'e priense duni elementu husi krime ofensa ba integridade física simples ho natureza violéncia doméstika hasoru nia feen. Tanba ne'e, prokuradór laiha duvida ba faktu sira hotu iha akuzasaun no husu ba tribunál atu kondena arguidu ho pena ne'ebé hakerek ona iha akuzasaun, atu nune'e bele iha prevensaun jerál ba arguidu no ema seluk labele halo tuir iha futuru.

Enkuantu defeza haktuir katak arguidu kolabora diak ho tribunál, konfesa faktu hotu iha akuzasaun depoisde akontesimentu arguidu sente hahalok hanesan ne'e ladi'ak, arrepende ona nia hahalok, diak malu ona to'o agora moris hamutuk nafatin iha uma ida hanesan feen ho la'en, foin primeiravés mai hatan iha tribunál, promete sei larepete hikas hahalok ne'e iha futuru, serbisu hanesan funsionariu publiku, iha oan na'in haat no arguidu mak iha responsabilidade maximu ba lezada ho nia família sira. Tanba ne'e, husu ba tribunál atu aplika pena ne'ebé adekuadu ba arguidu.

### **Desizaun**

Depoisde avalia faktu hotu, tribunál prova katak arguidu uza fiu komputador nian baku dala ida iha lezadu nia matan fukun parte loos, tuku dala ida iha lezada nia oin maibé lakonsege kona, tanba lezada satan netik ho liman no kona fali iha lezada nia liman no kontinua tebe dala ida iha lezada nia ibun parte loos, rezulta lezada sofre, bubu, mean no moras.

Bazeia ba faktu provadu sira ne'e no tetu mós ho sirkunstánsia atenuante sira hanesan, arguidu konfesa, arrepende ninia hahalok, di'ak malu ona ho lezada, foin primeiravés mai hatan iha tribunál no promete sei la komete tan krime hanesan iha futuru hasoru lezada ka ema seluk. Ho nune'e tribunál konklui prosesu ne'e no kondena arguidu ho pena multa US\$240.00 ne'ebé arguidu sei selu US\$2.00 kada loraun durante loraun 120 Tribunál mos fiksa pena alternativa durante loraun 80 iha prizaun, bainhira arguidu la selu pena multa refere.

### **6. Krime ofensa ba integridade física simples ho natureza violéncia doméstika**

Nú. Prosesu : 0002/23.OEPMK  
Kompozisaun Tribunál : Singulár  
Juis : Dra. Yudi Pamukas  
Prokuradór : Dr. Mateus Nesi  
Defeza : Dr. Calisto Tout  
Desizaun : Pena prizaun tinan 1 fulan 6 suspende ba tinan 2

Iha 16 Maiu 2023, Tribunál Judisiál Primeira Instánsia Oekusi prezide leitura sentensa ba kazu ofensa ba integridade física simples ho natureza violéncia doméstika ne'ebé envolve arguidu JS hasoru nia feen, iha RAEOA.

### **Akuzasaun Prokuradór**

Prokuradór akuza katak iha 06 Janeiro 2023, maizumenus iha oras tuku 20:00 kalan, arguidu basa dala rua iha lezada nia hasan parte karuk, tuku dala rua iha lezada nia hasan parte karuk, tuku dala rua iha lezada nia kabaas parte karuk, tebe dala rua iha lezada nia kotuk laran rezulta lezada monu ba rai, rakut lezada nia fu'uk no rasta lezada ba iha rai. Konsekuensia husi arguidu nia hahalok ne'e rezulta lezada sofre moras

maka'as. Antes agresaun ne'e, arguidu ho lezada diskute malu kona-ba arguidu diskunfia lezada amante (*selingkuh*) ho mane seluk. Kazu ne'e aneksa hamutuk ho relatóriu médiku husi PRADET no fotografia sira hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a) 35(b) no 36 LKVD.

### **Produsaun ba prova sira**

Iha julgamentu, arguidu konfesa faktu hotu iha akuzasaun no deklarata katak hahalok sira ne'e ladi'ak tanba bele halo lezada sofre moras, arrepende nia hahalok, diak malu ona to'o agora moris hamutuk nafatin iha uma ida hanesan feen ho la'en, foin primeiravés mai hatan iha tribunál, promete sei larepete hikas hahalok hanesan iha futuru, serbisu hanesan toos na'in laiha rendementu fixu kada fulan no arguidu mak tau matan ba nia família.

Alende ne'e, lezada kontinua konfirma faktu hotu iha akuzasaun no deklarata katak depoisde akontesimentu to'o agora arguidu la halo ona agresaun fízika hasoru lezada no moris hamutuk nafatin iha uma ida hanesan feen ho la'en. Lezada kontinua reforsa liután katak desde sira hola malu to'o agora arguidu foin primeiravés halo agresaun fízika hasoru lezada.

### **Alegasaun finál**

Prokuradór konsidera arguidu ninia hahalok ne'e priense elementu husi krime ofensa ba integridade fízika simples ho natureza violénsia doméstika hasoru nia feen. Tanba ne'e, prokuradór laiha duvida ba faktu sira ne'ebé hakerek ona iha akuzasaun, nune'e husu ba tribunál atu kondena arguidu ho pena prizaun tinan 2 suspende ba tinan 2.

Enkuantu defeza haktuir katak arguidu kolabora diak ho tribunál, konfesa faktu hotu iha akuzasaun depoisde akontesimentu arguidu sente hahalok hanesan ne'e ladiak, arrepende ona nia hahalok, oan na'in tolu dependensia ekonomia ba malu, diak malu ona to'o agora moris hamutuk nafatin iha uma ida hanesan feen ho la'en, foin primeiravés mai hatan iha tribunál, promete sei larepete hahalok hanesan iha futuru, serbisu hanesan toos na'in laiha rendementu fixu kada fulan no arguidu mak tau matan ba nia família. Tanba ne'e, husu ba tribunál atu aplika pena ne'ebé adekuadu ba arguidu.

### **Desizaun**

Depoisde avalia faktu hotu, tribunál prova katak arguidu basa dala rua iha lezada nia hasan parte karuk, tuku dala rua iha lezada nia hasan parte karuk, tuku dala rua iha lezada nia kabaas parte karuk, tebe dala rua iha lezada nia kotuk laran rezulta lezada monu ba rai, rakut lezada nia fu'uk no rasta lezada ba iha rai.

Bazeia ba faktu provadu sira ne'e no tetu mós ho sirkunstánsia atenuante sira hanesan, arguidu konfesa, arrepende nia hahalok, di'ak malu ona ho lezada, foin primeiravés mai hatan iha tribunál no promete sei la komete tan krime hanesan iha futuru. Tanba ne'e,

tribunál konklui prosesu ne'e no kondena arguidu ho pena prizaun tinan ida fulan neen suspende ba tinan rua.

## **7. Krime kontrabandu**

Nú. Prosesu : 0070/22.OESIC  
Kompozisaun Tribunál : Kolektivu  
Juis : Dr. Yudi Pamukas  
: Dra. Florencia Freitas  
: Dr. Hugo da Cruz Pui  
Prokuradór : Dr. Mateus Nesi  
Defeza : Dr. Calisto Tout  
Desizaun : Pena prizaun tinan 2 suspende ba tinan 2

Iha 16 Maiu 2022, Tribunál Judisiál Primeira Instánsia Oekusi prezide julgamentu leitura akordaun ba krime kontrabandu ne'ebé envolve arguidu Daniel dos Santos Abi, Jefriano Bubun, Antonio Elo ho arguidu Amrosio Caet hasoru Estadu RDTL, iha Suku Naimeco Sub-regiaun Pante-makasar, Regiaun Administrativu Espesiál Oekusi Ambeno (RAEOA).

### **Akuzasaun Prokuradór**

Prokuradór akuza katak iha 20 Maiu 2022, maizumenus iha oras tuku 14:45 meiodia, arguidu sira hamutuk halo importasaun ba nehek teen saku haat husi territoriu Timor-Leste sai ba Indonezia ilegalmente tanba laliu husi Alfandega hodi selu taxa ba Estadu RDTL. Kazu ne'e aneksa hamutuk ho fotografia kona-ba arguidu nia asaun ne' e mai husi polísia.

Prokuradór akuza arguidu sira kontra artigu 316 KP kona-ba krime kontrabandu ho moldura penál tinan 2 too tinan 6 ka multa.

### **Produsaun ba prova sira**

Iha julgamentu, arguidu sira konfesa integralmente katak sira na'in haat ida-ida lori nehek teen saku ida hatama ba territoriu Indonezia atu bele hetan rendimentu hodi sustenta sira nia nesiedade uma laran nian no hatene hahalok hanesan ne'e ladi'ak no arrepende ona sira nia hahalok. Arguidu sira serbisu hanesan toos na'in laiha rendimentu fiksu kada fulan, arguidu sira foin primeiravés mai hatan iha tribunál, arguidu sira hot-hotu mesak kaben na'in no iha ona oan, promete sei larepete hikas hahalok ne'e iha futuro.

Depoisde rona deklarasaun arguidu sira nian, prokuradór konsidera prova suficiente ona nune'e husu ba tribunál atu presinde testemuña ninia depoimentu. Defeza laiha opozisaun ba pedidu ne'e. Bazeia ba pedidu ne'e, tribunál presinde testemuña ninia depoimentu.

### **Alegasaun finál**

Prokuradór konsidera faktu hotu iha akuzasaun provadu, bazeia ba konfisaun arguidu sira nian no hahalok arguidu arguidu sira nian priense duni elementu krime kontrabandu nune'e husu ba tribunál atu kondena arguidu sira tuir pena ne'ebé hakerek ona iha artigu 316 KP.

Entretantu defeza husu ba tribunál atu kondena arguidu sira ho pena ne'ebé kmaan ho konsiderasaun katak arguidu sira konfesa, arrepende ona sira nia hahalok, foin primeiravés mai hatan iha tribunál no promete sei la repete tan krime hanesan iha futuru.

### **Desizaun**

Depoisde avalia faktu hotu tribunál prova katak arguidu sira hamutuk halo importasaun ba nehek teen saku haat husi territoriu Timor-Leste sai ba Indonezia ilegalmente tanba laliu husi Alfandega hodi selu taxa ba Estadu RDTL.

Bazeia ba faktu provadu sira ne'e no tetu mós ho sirkunstánsia atenuante sira hanesan, arguidu sira konfesa, arrepende ona sira nia hahalok, foin primeiravés mai hatan iha tribunál no promete sei la komete tan krime hanesan iha futuru. Tanba ne'e tribunál konklui prosesu ne'e no kondena arguidu sira ho pena prizaun tinan rua suspende ba tinan rua.

### **8. Krime ofensa ba integridade física simples ho natureza violéncia doméstika**

Nú. Prosesu : 0001/23.OEOSL  
Kompozisaun Tribunál : Singulár  
Juis : Dra. Florencia Freitas  
Prokuradór : Dr. Mateus Nesi  
Defeza : Dr. Afonso Gomes Fatima  
Desizaun : Pena prizaun fulan 6 suspende ba tinan 1

Iha 16 Maiu 2023, Tribunál Judisiál Primeira Instánsia Oekusi prezide leitura sentensa ba krime ofensa ba integridade física simples ho natureza violéncia doméstika ne'ebé envolve arguidu DS hasoru nia feen, iha RAEOA.

### **Akuzasaun Prokuradór**

Prokuradór akuza katak iha 31 Dezembru 2022, maizumenus iha oras tuku 19:00 lokraik, arguidu basa dala ida iha lezada nia hasan parte karuk buti dala ida iha lezada nia kakorok rezulta lezada sofre moras. Antes agresau ne'e, arguidu ho lezada diskute malu kona-ba lezada lahatan sira nia oan ba misa, tanba atu hein uma, nune'e mosu agresau ne'e. Kazu ne'e aneksa hamutuk ho relatóriu médiku husi Sentru Saúde Oesilo no fotografia sira hasai husi polísia.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a) 35(b) no 36 LKVD.

### **Produsaun ba prova sira**

Iha julgamentu, arguida konfesa integralmente ba faktu hotu iha akuzasaun no hatene buti lezada nia kakorok no basa bele sofre moras maibé arguidu halo ho hakarak rasik sein haruka husi ema seluk. Depoisde akontesimentu arguidu sente hahalok hanesan ne'e ladi'ak, arrepende nia hahalok, diak malu ona too agora laiha tan problema seluk, foin primeiravés mai hatan iha tribunál, promete sei larepete hahalok hanesan iha futuru, serbisu hanesan toos na'in laiha rendimentu fiksi kada fulan no iha oan na'in tolu.

Prokuradór husu ba tribunál atu presinde lezada nia deklarasaun no husi parte defeza laiha opozisaun ba pedidu ne'e. Tanba ne'e, tribunál bazeia ba pedidu ne'e no presinde lezada nia deklarasaun tanba arguidu rasik konfesa faktu hotu iha akuzasaun.

### **Alegasaun finál**

Prokuradór konsidera arguidu ninia asaun ne'e priense duni elementu husi krime ofensa ba integridade fízika simples ho natureza violénsia doméstika hasoru nia feen. Tanba ne'e, prokuradór laiha duvida ba faktu sira hotu iha akuzasaun no husu ba tribunál atu kondena arguidu ho pena ne'ebé hakerek ona iha artigu 145 KP.

Enkuantu defeza haktuir katak arguidu kolabora diak ho tribunál, konfesa faktu hotu iha akuzasaun depoisde akontesimentu arguidu sente hahalok hanesan ne'e ladiak, arrepende ona nia hahalok, diak malu ona to'o agora moris hamutuk nafatin iha uma ida hanesan feen ho la'en, foin primeiravés mai hatan iha tribunál, promete sei larepete hikas hahalok ne'e iha futuro, serbisu hanesan toos na'in laiha rendimentu fixu kada fulan, iha oan na'in tolu no arguidu mak iha responsabilidade maximu ba nia família sira. Tanba ne'e, husu ba tribunál atu aplika pena ne'ebé adekuadu tuir arguidu nia sala.

### **Desizaun**

Depoisde avalia faktu hotu, tribunál prova katak arguidu basa dala ida iha lezada nia hasan no buti dala ida iha lezada nia kakorok rezulta lezada sofre moras.

Bazeia ba faktu provadu sira ne'e no tetu mós ho sirkunstánsia atenuante sira hanesan, arguidu konfesa, arrepende ona nia hahalok, diak malu ona ho lezada, foin primeiravés mai hatan iha tribunál no promete sei la repete tan krime hanesan iha futuro, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

### **9. Krime ameasa ho arma brankas**

Nú. Prosesu : 0065/22.OESIC  
Kompozisaun Tribunál : Singulár  
Juis : Dr. Yudi Pemarkas  
Prokuradór : Dr. Mateus Nessi  
Defeza : Dr. Calisto Tout  
Desizaun : Pena multa no omologa pedidu dezisténsia keixa

Iha 16 Maiu 2023, Tribunál Judisiál Primeira Instánsia Oekusi prezide leitura sentensa ba krime ameasa no arma brankas ne'ebé envolve arguidu JTC hasoru nia feen, iha RAEOA.

### **Akuzasaun Prokuradór**

Prokuradór akuza katak iha 15 Maiu 2022, iha oras tuku 18:00 lokraik, arguidu kaer katana hatudu ba lezada no koalía ba lezada katak "*sei ta'a mate lezada ko'a hanesan na'an*", arguidu nia hahalok ne'e rezulta lezada sofre tauk. Iha akontesimentu, testemuña kontaktu ba polísia no polísia desloka kedas ba iha fatin akontesimentu hodi hakalma

situasaun no PRADET ba tula lezada lori ba Uma-Mahon hodi toba kalan rua tanba ta'uk no lezada kontinua apresenta keixa iha Polísia Esquadra PNTL Pante-Makasar.

Arguidu hatene katak kaer katana hodi hatudu ba ema seluk ne'e bele hamosu perigu ba ema seluk nia vida. Arguidu halo krime ne'e ho livre, deliberada, konsientemente, aproveita situasaun ne'ebé adekuada ameasa lezada, kauza ta'uk kontra lezada nia vontade. Arguidu hatene katak hahalok ne'e lei bandu no hatene sei hetan kastigu tuir lei.

Prokuradór akuza arguidu kontra artigu 157 KP kona-ba krime ameasa ho moldura penál too tinan 1 ka multa no artigu 20 (1), artigu 2 (2 alinea f) kona-ba krime arma brankas.

### **Produsaun ba prova sira**

Antes tama ba produsaun ba prova tribunál halo tentativa konsiliaun ba krime ameasa lezada hakarak deziste nia keixa hasoru arguidu tanba depoisde akontesimentu ne'e arguidu ho lezada kontinua moris hamutuk too agora laiha tan problema seluk no arguidu mós aseita no hakarak dame malu de'it ho lezada ba krime ameasa. Tanba ne'e, tribunál bazeia ba lezada nia pedidu ne'e omologa pedidu dezisténsia keixa refere no absolve arguidu husi krime ameasa, no kontinua prosesu julgamentu ba kazu arma brankas.

Iha julgamentu arguidu konfesa parsialmente ba faktu sira iha akuzasaun katak iha akontesimentu ne'e arguidu kaer duni katana no ameasa duni lezada tanba lezada koalía barak liu, maibé arguidu kaer katana ho intensaun atu hakalma lezada labele koalía barak. Depoisde akontesimentu ne'e arguidu husu ona deskulpa ba lezada, sira diak malu ona no moris hamutuk nafatin hanesan feen ho la'en.

Enkuantu lezada konfirma faktu hotu iha akuzasaun no deklarata katak diak malu ona ho arguidu no perdua ona arguidu no moris hamutuk nafatin hanesan feen ho la'en.

### **Alegasaun finál**

Prokuradór konsidera arguidu provadu komete krime arma brankas hasoru lezada, mezmú arguidu koko atu nega faktu balun maibé lezada konfirma, nune'e prokuradór husu ba tribunál atu kondena arguidu ho pena multa.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak arguidu kaer duni katana, maibé ho intensaun atu lezada labele koalía barak tan no la'os atu halo krime hasoru lezada no arguidu mak iha responsabilidade másimu ba ninia família.

### **Desizaun**

Depoisde avalia faktu hotu ne'ebé produs durante julgamentu no tribunál konsidera arguidu ninia hahalok provadu priense duni elementu husi krime arma brankas, tanba kaer katana hatudu ba ema seluk ne'e perigu tebes ba ema nia vida.

Bazeia ba faktu provadu sira ne'e hotu no tetu mós ho sirkunstánsia agravantes no atenuantes sira, nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu sentavus 0,50 kada loraun durante loraun 90. Tribunál

mós fiksa pena alternativa durante loron 60 iha prizaun, bainhira arguidu la kumpri pena multa refere.

#### **10. Krime kondusaun sein karta**

Nú. Prosesu : 0040/23.OESTR  
Kompozisaun Tribunál : Singulár  
Juis : Dr. Yudi Pamukas  
Prokuradór : Dr. Mateus Nesi  
Defeza : Dr. Calisto Tout  
Desizaun : Pena multa US\$100.00

Iha 28 Maiu 2023, Tribunál Judisiál Primeira Instánsia Oekusi prezide leitura sentensa krime kondusaun sein karta ne'ebé envolve arguidu Domingos Caet hasoru estadu RDTL. Iha Aldeia Sanane, Suku Costa Sub-regiaun Pante-makasar, RAEOA.

#### **Akuzasaun Prokuradór**

Prokuradór akuza katak iha 25 Maiu 2023, maizumenus iha oras tuku 10:10 dadeer, arguidu viagem ho motorizada marka honda KLX saimo, kor mutin kahur mean laiha número matrikula no laiha karta kondusaun. Arguidu halo viagen husi Numbey atu ba kontrola projeitu iha Noel-ekat. Bainhira too iha merkadu Tono hasoru malu ho ekipa polisia tranzito ne'ebé hala'o patrolhamentu iha Bairo Tono hodi hapara arguidu no pasa revista ba dokumentu motorizada nian no dokumentu motorista nian, hodi deskobre arguidu kondus motorizada sein karta kondusaun.

Prokuradór akuza arguidu kontra artigu 207 KP kona-ba krime kondusaun sein karta ho moldura penál to'o tinan 2 ka multa.

#### **Produsaun ba prova sira**

Iha julgamentu, arguidu konfesa integralmente ba faktu hotu iha akuzasaun, arguidu mós deklarar katak arrepende ona nia hahalok, foin primeiravés halo krime no mai hatan iha tribunál, arguidu hanesan kaben na'in iha oan na'in ida, serbisu hanesan negociante kiik ho rendimentu kada fulan US\$100.00 no promete sei larepete hikas hahalok ne'e iha futuro no arguidu mak iha responsabilidade maximu ba nia família.

Prokuradór husu ba tribunál atu presinde testemuña nia depoimentu no husi parte defeza laiha opozisaun ba pedidu ne'e. Tanba ne'e, tribunál bazeia ba pedidu ne'e no presinde testemuña nia depoimentu tanba arguidu rasik konfesa faktu hotu iha akuzasaun.

#### **Alegasaun finál**

Prokuradór konsidera hahalok arguidu nian provadu tuir faktu sira iha akuzasaun tanba durante iha produsaun ba prova arguidu rasik konfesa no arrepende ona nia hahalok maibé atu bele iha prevensaun jerál ba krime refere husu ba tribunál atu aplika pena ne'ebé hekerek ona iha artigu 207 KP.

Enkuantu defeza husu ba tribunál atu kondena arguidu ho pena ne'ebé justu ho konsiderasaun katak arguidu konfesa, arrepende nia hahalok, foin primeiravés mai hatan iha tribunál no promete sei la repete tan krime hanesan iha futuro.

## **Desizaun**

Depoisde avalia faktu hotu tribunál prova katak arguidu provadu komete krime tanba kondus motoriza laiha karta kondusaun.

Bazeia ba faktu provadu sira ne'e hotu no tetu mósho sirkunstánsia hotu-hotu ne'ebé haleu krime ne'e. Tribunál konklui prosesu ne'e no kondena arguidu ho pena multa US\$100.00, ne'ebé arguidu sei selu US\$1.00 kada lora, durante lora 100. Tribunál mós fiksa pena alternativa durante lora 66 iha prizaun, bainhira arguidu la selu pena multa refere.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)